

«Itxaropenezko eta etorkizuneko» uda ikastaroak aurkeztu ditu UEUK

Zortzi ikastaro gehiago eskainiko dira Miarritzeko eta Iruñeko jardunaldietan

Alberto Barandiaran / Iruñea

Uztailaren 5ean Miarritzen abiatuko diren 27. Udako Ikastaroak «itxaropen eta etorkizunekoak» izango dira, atzo Iruñean egin zen aurkezpen publikoan Mikel Aizpuru Udako Euskal Unibertsitateko zuzendariak esan zuenez. Eusko Jaurlaritzarekin iaz sinatutako akordioari esker arlo ekonomikoa ziurtatuagoa izanik, 39 ikastaro eskainiko ditu UEUK.


IAZ heldutasuna eta oreka izan zen UEUKo ikastaroen lema; aurtengoa, berriz, itxaropena eta etorkizuna izan liteke. Mikel Aizpuru zuzendariak atzo nabarmendu zuen azken urte honetan euskararen munduan izaniko aldaketa «dezentekoa» —Bai euskarari kanpainaren inguruko mobilizazioetan gizarteak erakutsitako jarraera eta unibertsitateetan euskara normalizatzeko eginiko saialdiak eta eskaerak— lagungarri izan dela aurtun baikortasunez begiratzeko etorkizunari, eta hasierako urteetan nagusi zen itxaropena «zabalduz» doala esan zuen.

Halaber, unibertsitate publiko zein pribatuetan euskararen tokia gero eta garrantzitsuagoa dela eta joera hori denborarekin areagotu egingo dela esan zuen Aizpuruk. «UEUK pozez ikusten ditu azken urte honetan gertatutakoak, gure herriaren normalizazioa bideratzeaz gain, jakintzaren sortzea eta zabaltzea bultzatuko dutelakoan».

Lasaitasun ekonomikoa

Giroa ez ezik, hainbat erakunderekin lortutako akordio ekonomikoak ere nabarmendu zituen Aizpuruk. «Hemendik aurrera itxaropen handiagoz egin ahal izango dugu lan».

Ikastaroetan izena emateko epea ekainaren 1etik 25era izango da Miarritzeko, eta ekainaren 1etik 30ra Iruñerako. Astebeteko matrikularen prezioa 11.500 pezetakoa (455 libera) izango da langabetuentzat, eta 15.000 pezetakoa (593 libera) gainerakoentzat.



UEUKo ikasleak, iaz Miarritzen, materiala jasotzen.

datu nagusiak

Zortzi ikastaro gehiago

Ikastaro kopuru handiagoa eta UEUK aurtun behintzat izango duen lasaitasun ekonomikoa dira aurtengo udako saioen ezaugarri.

Miarritze • Zortzi ikastaro eskainiko dira aurtun: historia, psikologia, zientzia politikoak, sexologia, soziolinguistika, natur zientziak, musika eta pedagogia sailletakoak.

Iruñea • Nafarroako hiriburuko Larraona Ikastetxean eta Iturrama Institutuan bilduko da, ohi bezala, ikastaro hauen mami gehiena. Aurtun sanferminak amaitu eta beranduxeago hasiko dira, uztailaren 19an hain zuzen, eta hilaren bukaera arte iraun-

go dute. Ikastaro berriak izango dira orain arte bakarrik Miarritzen egiten ziren kaze-tarritza, soziolinguistika eta literatura sailen emanaldiak, esate baterako, eta erabat berria Geografiari buruz egingo dena.

Diruaz • Mari Karmen Menika UEUKo idazkariak emandako datuen arabera, 32,5 milioi pezetako aurrekontua dute ikastarook (1,3 milioi libera inguru), eta horren erdia ia kitatu egingo da ikasleen matrikulen bidez. Gainontzekoa dirulaguntzen bidez hornituko dela aipatu zuten UEUKo arduradunek. Nafarroako Gobernuak, esate baterako, aurtun hiru milioi pezeta (120.000 libera) eman dizkio UEUri.

DBH osteko hezkuntza eskaintza osoa bermatuko du Ibaizabal ikastola berriak

Durangaldeko gazte euskaldunei lan merkatutako sarrera erraztea du helburu

Kristina Martin / Bilbo

IBAIZABAL ikastola berriaren egitasmoa aurkeztu zen atzo Bilboko Euskalduna jauregian. DBH Derrigorrezko Bigarren Hezkuntzaren osteko eskaintza osoa bermatuko du.

Datorren ikasturtean, hots, aurtengo irailean, Batxilergoaren hiru adarren (humanistikoa, teknologikoa eta zientifikoa) lehenengo maila jarriko da abian, alde

batetik, eta bestetik, arautu gabeko ikasketak, hala nola INEMek eta Hobetuz-ek eskaintzen dituzten ikastaroak. Lanbide Heziketako goi eta erdi mailako zikloak, berriz, ez dira hurrengo ikasturte arte eskainiko. Nolanahi ere, bost urteren buruan eskaintza osoa osotuko du ikastola berriak.

Horretaz gain, «Ibaizabalgo ikasleek inguruko enpresetan praktikak egin ahal izateko akordioak lantzen ari

gara», esan zuen Andoni Mugikak, proiektuaren zuzendariak. Halaber, «enpresen sortzaileen egungo kopuru txikia areagotzeko, proiektu berrien bultzatzailei tutoretzak eskainiko zaizkie».

Durangoko Kurutziaga, Ondarruko Zubi Zahar, Etorrioko Txintxirri, Zornotzako Andra Mari eta Lekeitioko Resurreccion Maria de Azkue ikastolek bultzatu dute Ibaizabal egitasmoa.

Datozen bi urteetarako Gobernu Batzarra aukeratu du EHUK

332 milioiko superabitarekin itxi du jarduna lehenengo Gobernu Batzarrak

Erredakzioa / Bilbo

DATOZEN bi urteetarako Gobernu Batzarrekokideak hautatu zituen atzo Euskal Herriko Unibertsitateak (EHU). Erakunde kolegiatu hori EHUKo ohi-ko gestioaz arduratzen da. Ordezkarri berriak aukeratu baino lehen, azken bi urteotan jardun duen batzarra aho batez onartu zuen 1998ko aurrekontuaren likidazioa, 332 milioi pezetako superabitarekin. Jon Barrutia Ekonomia arloko errektoreordeak ohartarazi zuenez, «superabitak ez du adierazten EHUK baliabideak soberan dituenik, ezta onartutako aurrekontua bete ez duenik ere; iazko abenduan unibertsitateak izandako ezusteko diru sarrera biei esker gertatu da superabita», argitu zuen.

Lehenengo diru sarrera Europako Fondo Sozialekoa da, espero baino diru gehiago jaso baitzuen Unibertsitateak. Bigarrena, berriz, Espainiako Hezkuntza Ministerioarena; erakunde horrek, EHUri ez ezik, Espainiako Estatuko beste unibertsitateei ere dirulaguntza handitu zien, tasen murrizketa orekatzeko. Gobernuak lau seme-alabatik hirura murriztu zuen matrikula doakoa izateko eskubidea zeukaten familiarren gutxieneko kopurua, eta erabaki horrek eragin kaltegarria izan zuen unibertsitateetako tasen bidezko sarreretan.

Barrutiak esan zuenez, «Unibertsitateak behar handiak izaten segitzen du, eta horregatik, hain zuzen, soberan dagoen diru hura non inbertitu oso ondo pentsatu behar da».

Euskal sindikatuak gora

Fernando Mijangos, LABeko ordezkarria eta EHUKo irakaslea, pozik agertu zen batzar sortu berrian ELA, LAB eta EILAS sindikatuetako kideen kopurua igo delako: «Gizartean gertatzen ari den egoera itxaropentsuak unibertsitatean ere isla duelako».